


# BIKÈÈNÀ-KUMÒNA

BYÀ WILLIAM BRANHAM

 Mukàbà wà mèyi ewu wùdi munkaci mwà kukwàciibwa bwà Bukalenge bwà Nzambi, mündi ngùpeesha Mwanèètù Lee Vayle bwà kufùndayè. Mwanèètù Vayle mmundòmbe, mwab'ewu mwìsù mwà Mwanèètù Mercier, bwà—bwà kufilaku ndambù wa bikèènà-kumòna byà mbangilu abi. Mu bushùwà bwà bwalu, bikèènà-kumòna muvwàbi...Ndi... byàkumpà-...Cimwè cyà ku bintu byà kumpàla bìndi mwà kuvùluka, mbikèènà-kumòna, munkaci mwà kulwa. Bikèènà-kumòna bitu ànu bilwa dîbà dyònsò. Kàdi ngeela meeji ne byà paanyimà pàà dikudimuna dyànyì dyà mucìma ki biwùdi ujinga, Mwanèètù Vayle.

<sup>2</sup> Èè, ndi mvùluka ne, paanyimà pàà mémè mumane kujidiibwa mu mudimu wà bwambi mu èkèleeziyà, èkèleeziyà wa ba-Baptistes, kùdi Docteur Roy Davis, mwab'ewu mu Mùsèèsù wà Watt mu Jeffersonville emu, mwaba ùvwa èkèleeziyà usanganyiibwa cikondo aci. Ndi mvùluka cikèènà-kumòna cyà pabwàci, kakùyi kwanji kupita mbingu mikesè paanyimà pàà... bu... Twàmbà ne, ndambù wa matùkù paanyimà pàà dijidiibwa dyànyì mu mudimu wà bwambi. Mvwa...ngààkamòna cikèènà-kumòna cyà muntu mukulakaji kampànda uvwa mulàadika mu lùpitaadi awu, uvwa muzaaza. Ùvwa muntu wa bafiike. Nènku wàkondopiibwa ànu mu cità ne cità, mu mùshindù wà ne, cyàkatwala mùyùmbà wàbùngì. Ki kuujukaye mu bulaalu e kukwàta njila kuya.

<sup>3</sup> Nènku matùkù àbìdi, matùkù matwè ku àbìdi, paanyimà pàà cyôci aci, mvwa ku mudimu wà ngenda nkòsela, bàvwà kabàyi bafute mfranga mu New Albany, yà facture yà mâyi, ne gaz, ne—ne yà nzembu abu. Nènku civwa...Mvwa mùle tente ne disànka be! Musangu wònsò wùmvwà nsangana nzùbu wa kale, mvwa ànu mbwelamu cyanàànà nsambila, nudi bamanye's, mùvwà kamùyi bantu amu.

<sup>4</sup> Nènku ndi mvùluka ne mvwa ndondela Mukalenge Johnny Potts, uciidi ne mwoyi ne leelù ewu ewu. Ùkaadi wìpacila menemene, ngeela meeji, ku bidimu makumi mwandamutekète anyì makumi mwandamukùlù. Yèyè uvwa mubadi wa compteur wa kale. Nènku bàkaavwa bamuumushe ku dibala dyà compteur mwine musangu awu, nènku bavwa bamutèèke ku mèèsà, bwà kwakidila midyàbilu ne bikwàbò, ànu ku cibweledi cyà ciibi aku, ne mabiikila à mudimu. Nènku mvwa munkaci mwà kumulondela civwà Mukalenge mundèjè. Nènku, ku musangu ne

ku musangu, ùvwa ùbala ndambù wa compteurs yà kule yìvwà mwena mudimu wa ciibidilu kàyì mufikàku ayi. Nènku mu cyòci eci, ùvwa—ùvwa wambila, muntu kampànda . . .

<sup>5</sup> Bwalu, mvwa mumòne mu cibejibeji, mùvwàbo ne ditempu dyà kale. . . Mu miine matùkù awu, bavwa bendesha tubalu túbìdì, bwà kuumusha bukooyà ne bucyafù, mu njila. Kuvwa muntu mulùme mukulakaji wa bafìke dìnà dyèndè Mukalenge Edward J. Merrell. Ùvwa musòmbèle mu nomba wa 1020 mu Mùsèsù wa Clark mu New Albany. Nènku bàvwa bamukùma kùdì bantu bàbìdì bàà batòòke, bàvwa nsongààkàji wa batòòke ne—ne mwànà wa balùme, bènda bèndesha kashinyi. Nènku ùvwa mujimìje bukòntononyi bwà kashinyi, ne mumuzaaze mu nkàtà yà ditempu adi. Ne bivwa bicìbule mifùba yònsò yà mu mubidi wèndè, pamwè ne yònsò, nènku bamulandale mu cyàdì, nangananga. Nyimà wèndè muumusha pa kaaba kèndè. Nènku bavwa baye nèndè mu lùpitàadì, mu ngiikadilu mubì be.

<sup>6</sup> Nènku Mukalenge Potts, mwikàle ùpicila lwà ku—ku lùpitàadì aku mu New Albany mwàmwa, kumulondelaye bwà mùdì Mukalenge ùkwàta naanyi mudimu. Ki yèyè kutuma bantu bwà kulwa kumbìkila, bwà kukamusambidila. Ki dyàkàmwè, mèmè kudyambidila ne: “Ki muntu ùndì mumòne mu cikèèna—kumòna eci nyèyè awu.”

<sup>7</sup> Pa nàнку, mvwa—mvwa ne bwòwà ndambù bwà kuya, bwalu civwa cìmwè cyà ku byànyì byà ntwadijilu, nudi numòna’s, bwà kuya mùshindù awu. Pa nàнку, kàdi, nànsha nàнку, mèmè kuya kangata mulunda wanyi, ucivwa ànu ùfùmina ku dikùdimuna mucìma, mwànà mukèsè wa balùme wa beena France dìnà dyèndè George DeArk. Nènku mvwa mfuma ku dimufikisha kùdì Kìlistò. Ki twètù kubànda. Ki mèmè ne: “Mpindyewu, Mwanèètù George, ndi—ndi—ndi muswe bwà ùvùlukè. Bintu bìdì bingenzekela ebi, ncyèna mwà kubyumvwa to. Kàdi, vùluka ne, muntu ewu neòndopiibwe. Nènku pàdiye wondopiibwa, kùdì. . . Ncyèna mwà kumusambidila to ànu pàalwa bantu bàà batòòke bàbìdì abu kwimana ku luseke lukwàbò lwà bulààlu, bwalu bìdì bikèngela bwà mèmè kucyenza mùshindù ùvwàbo bacìndeejè awu.”

<sup>8</sup> Ki mèmè kubwela mu—mu lùpitàadì ne kukonka Mukalenge Merrell. Nènku mèmè kuya kuntwaku, ne mukàjèndè kungambilaye ne ùvwa mu bwalu bukolè bwà kacya. Ne kàvwa mwà kunyunga to bwalu cyamu cyà mìdimà civwa cileejè ne yìmwè yà ku mifuba yìvwà yìsanganyiibwe pabwìpì menemene ne bisùlùsùlù. Nènku bu yèyè mwà kunyunga, mòna’s, bivwa bifwànyìne, bifwànyìne kutubula bisùlùsùlù byèndè abi ne kumutunkumwisha mashi panshi ne kumushipa. Nènku ùvwa mu ngiikadilu mubì bikole be. Nènku avwa apumukila ndambù pa muminu wèndè apu, ne bikwàbò, bwalu avwa amuzònzokeela lwà mukana. Ùvwa mulàadika mwaba awu munda mwà matùkù matwè ku àbìdì. Nènku muntu awu ùvwa, pa diine díbà

adi, ne bidimu bitwè ku makumi àsambòmbò ne bitaanu, ngeela meeji, makumi àsambòmbò anyi makumi àsambòmbò ne bitaanu. Muntu mukulumpe; ne mumfwemfwe, bulewù, ùkaavwa mutòòkoloke. Ne nsuki yèndè mishààle mvyà.

<sup>9</sup> Ki mèmè kubwela e kwambila muntu ewu, nànsha nànkù, cikèènà-kumòna címvwà mumòne cyà kùdi Mukalenge aci. Ki nsonga ayi kubwelayi, yìvwà mimutuute ayi's. Nènku mèmè kutwà binù bwà kumusambidila. Ki dyàkàmwè, muntu ewu kwelaye lubila lukolè, wamba ne: “Ngöndöpìibù,” ne kulàndapukaye. Ki mukàjèndè, kuteeta bwà kumwaluja, mu bulààlu. Ki umwe wa ku baamingàngà balami kulwaye, ùteeta bwà kumulama mu bulààlu. Ki kulàndapukaye mu bulààlu amu, kwenzabi disaluka dyà bantu búngì cyanàànà. Nènku pangàakaya ku . . . Mèmè kwambila Mwanèètù George . . .

<sup>10</sup> Nènku díbà adi umwe wa ku baamànsèèlè, cìvwa lùpitaadi lwà beena Kàtòlikè, kubwelaye wamba ne bìvwa bikèngele bwà mèmè kupatuka muntwamu, bu mündi mutambe kusalula muntu awu. Bwalu, ùvwa ne mubidi kapyà, wìpacila ku degrés makùmi ànaayi. Kàdi cintu cyà cikemesha, pààkamupingajabomù; nsacerdòsè awu—awu, mwaba awu, ne bàmwè bàà ku bangàngàbukà bàvwa bamutèekemù, kumwenzejabo bwà kwalukila mu bulààlu, bwalu ùvwa mukaci mwà kuvwàla bilàmbà byèndè. Kàdi mbenze ànu bàmwangata cipimu cyà luuya anyi, kaciyi kàbìdi ne luuya alu to.

<sup>11</sup> Mpindyewu, kùdi bantu bààbúngì bàdi ne mwoyi leelù ewu, bààkamònà cikèènà-kumòna aci, bààkacimònà cyenzeke, anyi bamanye bwalu bwàci.

<sup>12</sup> Ki mèmè kupatuka e kwimana pa bibàndilu apu, ne kwambila Mwanèètù George ne: “Mpindyewu, tàngilààku. Neikalè mulwàta nkooci mufìkùlùke ne mwasà cifulu ku mutù. Neàtùùlukile ku bibàndilu ebi mene, mu tusunsa tukesè emu.” Nènku's ki cyàkenzaye bushùwà. Kupàtukaye buludi ne kupwekaye.

<sup>13</sup> Nènku bu—bu—bu bufùkù bùmwè paanyimà pàà cyôci aci, Mukalenge kummwenekela cyàkàbìdi, mu dindà kampànda, pabwìpì ne bufùkù kucyabu, ne kundeejaye mukàji kampànda mucibùkile panshi bibi be, bwà ne ùvwa ne cyà kusangala. Ki mèmè kwamba ne: “Èè, pàmwàpa nê—nênjandule mwaba udiye usanganyibwa.”

<sup>14</sup> Nènku ki mèmè kupweka bwà kukanga mulonda wà màyi kampànda, lwà kuulu kwàka, ngeela meeji ne mmwòmò, pabwìpì ne Mùsèèsù wà Mwandamukùlù mu New Albany amu. Nènku mvwa ne . . . Cìvwa nzùbu yìbìdi mitàngilàngàne, kàdi mvwa ne bwòwà ne nkwepì kúngìkàla mukange nseke yònsò yìbìdi's. Luseke lùmwe, bantu bàvwa bamwangale; ne lukwàbò luseke, bantu bàvwamù. Ki mèmè kuya ku luseke lùvwà ne—ne bantu alu's, lùvwàbò basòmbèle alu. Ki mèmè kukookola ku

ciibi. Nènku bavwa bantu bapèlè bèèbè bàà—bàà—menemene’s. Ki nsongààkàjì wa ukòka ntema, wa citende kulwaye ku ciibi aku, muvwàle mvwadilu wa kasuba. Ki yèyè—yèyè ne: “Udi ukeba cinyì?”

Mémè ne: “Udiku mwà kuswa bwà kuteeta màyi, bwà kumòna ní mmakànga anyì?”

<sup>15</sup> Ki yèyè ne: “Èyowà’s, mukalenge.” Ki kuyaye. Yèyè ne: “To. Màyi’s acidi ànukù.”

Mémè ne: “Twasàkidila.”

<sup>16</sup> Ki mamwëndè ewu, mulàadika pa bulààlu, dìnà dyèndè ùvwa Mandamu Mary Der Ohanian. Nènku ùvwa Arménienne. Mwanèndè wa balùme ùvwa unaya ndundu wa makàsà bu cimanu, ngeela meeji ne ke muvwabi, mu cisumbù cyà ndundu wa byanz- . . . , uh, cyà ndundu wa makàsà cyà mu New Albany. Nènku yèyè, mwanèndè wa bakàjì, ùvwa mu cilongelu cibandile. Dìnà dyèndè uvwa Dorothy. Ki yèyè ne. . . Dorothy kungambilaye ne: “Wèwè kwèna muntu wa Nzambi uvwa mwondopàngànè mu lùpitaadi emu, ditùkù dikwàbò anyì? Maamù wanyì mmuswè kuyiikilangana neebè.” Ke mémè kubwela.

<sup>17</sup> Ki kungambilayè mùvwaye mulààle, mucibùkile panshi. Ne yèyè ùkaavwa mucibùkile panshi, mu bulààlu, bidimu dikumi ne mwandamutekète, kacya ànu mwànà wa bakàjì ewu wàlediibwa. Nènku nsongààkàjì awu ukaavwa ne bidimu dikumi ne mwandamutekète. Ki mémè kumwambila ne. . . Yèyè ne: “Wèwè ki muntu wa Nzambi wàkondopa muntu awu anyì?”

<sup>18</sup> Mémè ne: “To, mandamu. Mémè ncyèna mwondopi to. Mémè ndi ànu—ànu nsambidila cyanàànà muntu udi usaama awu—awu, ne cìvwa cileeja kùdì Cikampànda cìvwa cingambile.” Ncìvwa mumanye mwà kucibùkila to; cikèèna—kumòna, anyì ní ncinyì. Ncìvwa mwanjì kumanya ne cìvwa ncinyì to. Mémè mvwa ànu mwànà wa balùme wetù ewu, wa mujikà ne bikwàbò byònsò. Nènku kuvwa . . . Inàbànzà ewu—ewu kundombaye disambila, bwèndè yèyè. Ki mémè kumwambila ne: “Ngǎnjì kusambila, dyàmbedi, ne pashiishe piikalabi ne Mukalenge mmundeeje bwà kwalukila apu.”

<sup>19</sup> Nènku dìbà adi pàngààkaditwà mu kusambila. . . Mvwa ne Mwanèètù George. Ki mémè ne: “Awu’s ki mukàjì ùmvwà—ùmvwa nkwambila ne mvwa musambidile. Ndi mumanye ne mmukàjì umweumwe awu. Lwà tuye.”

<sup>20</sup> Ki twètù kuya kuntwaku bwà—bwà kwenza disambila. Nènku ke mwànà mukesè wa bakàjì wa bidimu dikumi ne mwandamutekète ewu, mu bushùwà bwà bwalu, mémè mucikàle ànu nsongààlùmè wa citende. Nènku ùvwa ne mwanààbù wa balùme, wa bidimu bitwè ku bisambòmbò, mwandamukùlù, cintu bu nànkù awu. Nènku kuvwa mucì wà Noël, mpàvwà Noël ùcifuminakù ku dipita, mwimanyika mu nzùbu amu.

Nènku bavwa paanyimà pàà mucì wà Noël apu, bwà kunseka. “Bwà kwondopa mamwàbò.” Mvwa mumwambila ne Mukalenge ùvwa ne cyà kumwondopa. Nènku mèmè. . . Mèmè ne Mwanèètù George twètù kutwà binù bwà kusambila.

<sup>21</sup> Nènku ndi mwenze ànu mbanga kusambila, èè, Mwanjèlo ùntù mmòna, unùdì numòna mu cimfwànyì Awu, mèmè kuMumòna mulebelele kuulu kwa bulààlu aku. Èè, mèmè kwolola cyanza ne kumukwàta ku cyanza. Mèmè ne: “Mandamu Ohanian.” Mpindyewu, mukàjì ewu mmusòmbele mu New Albany ànu patùdì twakulangana apa, yèyè ne bayendè, ne famiye wendè. Ki mèmè ne: “Mandamu Ohanian. Mukalenge Yesù ngudi muntùme, ne mungambile kumpàla kwà kulwa, ne, bwà kukusambidila, ne wèwè uvwa ne cyà ‘kwondopiibwa.’ Juukila kuulu, usangale, mu Dîna dyà Yesù.” Mikòlò yèndè yikaavwa myuminyine. Yèyè, mwambule Bible wendè wa cyena Arménien awu lwà pa mwoyi wèndè apu, kubangaye kusemena ku luseke lwà bulààlu aku. Nènku mmwenze ànu wenza nàнку, yèyè. . .

<sup>22</sup> Pashiishe Sàtaanà kungaakwila, wàmba ne: “Wèwè mumulekele mudishiinde ànu panshi apu, neàcibuke nshingù, kuumukila ku bulààlu bùdì kuulu bwàbwa.” Mèmè kuumvwa bwòwà bwà katanci kakesè.

<sup>23</sup> Nènku mvwa misangu yònsò mumanye ne civwa bikèèna-kumòna abi, ncivwa mumanye ne civwa ncinyì mwine musangu awu to, cìvwaci cingambile cìvwa misangu yònsò ànu cilelèlà. Ki, nànsha nàнку, mèmè kumulekela ànu dimulekela utuuluka ku bulààlu aku. Nènku Nzambì mwikàle ntemu wanyì, mmwenze ànu ùtwadija, kutùpikaye kuumuka mu bulààlu abu, mikòlò yònsò yibidì kwololokayi. Mwanèndè wa bakàjì awu kwelaye lubila lukolè, wenda ùdikoka nsuki, ùpatuka lubilu mu mùsèèsù, wenda wela mbila mikolè ne dîyì dikolè dyà dikema. Beena mutumba kufuminabo nseke yònsò. Nènku’s ki yèyè awu mwaba awu, bwà musangu wà kumpàla munda mwà bidimu dikumi ne mwandamutekète, wenda wutwa ngendu mu cibambalu amu, utumbisha Nzambì. Mèmè kuumuka, dyàkamwè, bwà kubashiya.

<sup>24</sup> Paanyimà pàà matùkù mèmè kumanyangana ne nsongàakàjì awu, ne kubanga kukamusòmbesha. Mu bushùwà bwà bwalu, kabyèna bikèngela bwà eci kwikalaci cìkwàcìibwe pa mukàbà to, kàdì mvwa nkasòmbesha nsongàakàjì awu’s.

<sup>25</sup> Kakùyi kwanjì kunenga to paanyimà pàà aci, mu ndambù wa mbingu, mvwa nsanganyiibwa mu nzùbu wa maamù wanyì, dilòòlò kampànda. Ne mvwa nsambila, ditùkù adi, nènku ncivwa—ncivwa ànu mufwànyine kufikaku, ku—ku—bucìmunyi mu disambila dyànyì to. Ki mèmè kudyambidila ne, mvwa ànu mwà kushààla dyònsò. . . nudi bamanye’s, kuya kalààla. Mu cikondo aci, mvwa musòmbele kwètù kumbelu. Ki pa nàнку

mémè kubwela mu—mu cibambalu amu, bwà—bwà kusambila. Ki mémè. . . tukaavwa twipacila díbà ùmwè wa pàcyacyà, ngeela meeji. Ki mémè—mémè kusambila.

<sup>26</sup> Nènku, dyàkàmwè, mémè kutangila. Nènku, maman, ùvwa ne ciibidilu cyà kwangata bilàmbà byèndè, ne kubikùmpika ànu mu nkwasà, nudi bamanye's. Tuvwa bantu bapèle bèètù bàà menemene aba. Nènku mémè kutangila, ki Cintu kampànda cyà citòòke eci cyenda cilwa kùndi, ki mémè kwela meeji ne mvwa munkaci mwà kutàngila ku nkwasà wa bilàmbà awu. Kàdi's Civwa m'Mwanjèlo wa Mukalenge awu, Ditutu adi—adi, nudi bamanye's. Nènku kulwaDì lwà mwaba wúmvwà awu.

<sup>27</sup> Nènku mvwa—nènku mvwa mwimane mu cibambalu kampànda, cyà cikesè, citùtù tubiikila ne nzùbu wa “shotgun” awu's, nzùbu mukesè, mwololoke, mwikale ne tuubibambalu túbidi. Nènku ùvwa mulamika mabaya makunze lwà ku luseke lwà kuulu eku, nudi numòna's. Kuvwa bulààlu bwà milonda bukesè lwà ku luseke lwà dyàbalùme dyànyì eku. Kuvwa mukàji wa nsuki mifilike mwimane mweyèmène ku. . . Cibambalu cimwèpelè civwa cipàtukile mu cikukù. Mukàji ewu ùvwa mwimane mweyèmène ku ciibi cyà ku cikukù aci, munkaci mwà kudila. Mu mpàla mwànyì amu muvwa taatù kampànda mwimane, ne muntwadile mwànà wa mu dibòko, uvwa ne cintu kampànda citèèka pa cyàdi cyèndè cikesè aci. Nènku ùmwè, mukòlò wèndè wa dyàbakàji awu, uvwa wònsò makònyàngàle, mu mùshindù wà ne ùkaavwa mudijìngile ku kaamubidi kèndè kakesè aku. Ne mukòlò wà dyàbalùme, mukònyàngàle mutangile lunga luseke. Mabòko ònsò àbìdi makònyàngàle, òwò paawu, madijìngile ku kaamubidi kèndè aku's. Nènku kaamubidi kèndè kakesè aku kavwa kakònyàngàja ne kakònyàngàle too ne lwà ku nshìngù wèndè eku. Ki mémè kudikonka ne: “Eci cidi cyumvwija cinyì's?” Ki mémè kutàngila, ku dyàbakàji dyànyì aku kuvwa kusòmbè mukàji mukulakaji, nènku musòmbè mwaba awu, ukopola binetè byèndè, ne ubikupula binsonji anyì cintu kampànda ku binetè byèndè abi. Ku dyàbalùme dyànyì, mu nkwasà wa kanapè mukunze wa bisòmbèdi bìbìdi, uvwa wa mwomùmwè ne nkwasà awu, kusòmbè nsongàalùme wa citende, wa nsuki ya mvwàngalà mitòòkòlòke, utangidila pa dididiishi.

<sup>28</sup> Ki mémè kutàngila, lwà ku dyàbalùme dyànyì aku ntàntà kwimane, nènku mwòmò amu muvwa mwimane. . . Mwanjèlo wa Mukalenge awu. Ki Yèyè kungambila ne: “Mwànà ewu udi mwà kwikala ne mwoyi anyì?”

Ki mémè ne: “Mukalenge, ncyèna mumanye to.”

Yèyè ne: “Mutentèkele byanza pambidi. Neikale ne mwoyi.”

<sup>29</sup> Ki mémè—mémè kwenza nànu. Nènku mwànà awu kutupikaye panshi, ùmuka ku. . . ùmuka mu mabòkò à taatù. Ki mukòlò wèndè mukesè, wà dyàbalùme kwololokawu, ne luseke lwà dyàbalùme kwololoka, dibòkò dyà dyàbalùme

kwololokadi. Kwelaye cikwàbò cidya, ne luseke lukwàbò alu kwololokalù. Kwelaye cikwàbò cidya, ne luseke lukwàbò alu kwololoka, mubidi awu's, citùpà cyà munkacìnkacì kwololokacì. Ki kutèekaye byanza byèndè bikesè abi mu byànyì, kwambaye ne: "Mwanèètù Branham, ngùmùvù bìmpè mu kaabujima." Mwànà mukèsè wa mu dibòko awu uvwa muvwale muntumpù wà velùrè wà bleu, anyì cinsalabeetà, cinsalabeeta cikesè ne kalàmbà kaa pa cyàdì. Ne ùvwa ne nsuki mifiikuluke, ne kaamukana kakesè, kancing, kakesè kàa nememene's.

<sup>30</sup> Ki pashìishe Mwanjèlo wa Mukalenge kungambila ne Yèyè ùvwa ùya naanyì mwaba mukwàbò. Nènku mèmè kwangaciibwa kuyabo naanyì kule be. Ki Yèyè kunsòmbesha ku luseke lwà nkita yà kale, ne kundeejaye nomba yà ku dibwe dyà lukita kampànda, pabwìpì ne èkèleeziyà kampànda. Ki Yèyè ne: "Ewu ki mwaba uwikala mwà kudiludikila."

<sup>31</sup> Yèyè kuya naanyì mu mwaba mukwàbò. Nènku kuvwa . . . byenze bu ne civwa kaacimenga kakesè kampànda, kiikàle ne makajiinyì bu àbidì nàнку awu. Nènku àmwè avwa cibadi cyà mpàla ecì cyà kàlaabi, cilamika mabaya à kàlaabi ku bimanu. Ki mèmè kubanda kuntwaku, anyì kwimanakù. Nènku kuvwa muntu mukulumpe ùpàtukamù, mulwàte nkooci wa velùrè wa bleu, anyì nkooci wa jeans wa bleu ne nsalàbeetà yà bleu, ne kafulu kàa velùrè kàa kàlaabi ku mutù. Ùvwa ne mumfwèmfwè munène, mutòòke.

Yèyè ne: "Neàkuleeje njila."

<sup>32</sup> Nènku musangu wàkalondà ungàakapingana mu mèmè, mèmè kudìmòna mbwela mu cibambalu kampànda, ngenda ndonda mukàjì kampànda wa citende wa mubidi munenè. Nènku ndi mwenze ànu mbwela ku ciibi, bimfwànyì bìvwà pa mabeji malamika ku cimanu bìvwà bikunze. Lwà kuulu kwà ciibi aku kuvwa cimanyinu cifùnda ne: "Nzambi àbèneshekù dīkù dyètù." Ku luseke lwà dyàbalùme dyànyì kuvwa bulààlu bunène, bwà kale, bwà cyamu cyà kabanda. Ne ku dyàbakàjì kuvwa dicyùwà dyà citùpà cyà mucì ditèekakù. Kàdi lwà mu ditumba, mùvwa mulàadika mwànà wa bakàjì wa bidimu bitwè ku dikumi ne bitaanu. Nènku ùvwa mupete tunèkè anyì cintu kampànda, civwà cimunyanyishishe ne cibèndàmija mukòlò wèndè wà dyàbalùme. Ne dikàsà dyèndè dipèngàme, ne dibèndàmija mwinshì mwèndè. Nènku yèyè—nènku ùvwa ùmwèka bu mwànà wa balùme. Kàdi, ùvwa ne nsuki bu ya mwànà wa bakàjì, ne ùvwa ne—ne mishiku mivunga bu mwànà wa bakàjì.

Ki Yèyè kungambila ne: "Mwànà wa bakàjì awu ùdi mwà kwenda anyì?"

Ki mèmè ne: "Mukalenge, ncyèna mumanye to."

<sup>33</sup> Yèyè ne: "Nda ukamutentèkele byanza byèbè mu difù dyèndè amu." Ki mèmè kudyambidila ne ùvwa mwànà wa balùme,

bushùwà menemene, bu mùvwàYe ungambila bwà kumutèèka byanza mu difù. Mémè kwenza mwàkangambilaYe amu.

<sup>34</sup> Ki mémè kuumvwa muntu kampànda wàmba ne: “Mukalenge àtumbe.” Ki mémè kutangila muulu. Nènku ndi mwenze ànu mbandisha mèsù anyì, nsongàakàjì ewu wenda ujuukila kuulu’s. Nènku mmwenze ànu ujuukila kuulu, pìjámá uvwaye mulwàte, mukòlò wà pìjámá wendè awu kubandulukawu, ne kuleejawu cinù civùngàmàna mùtù cinù cyà mwànà wa bakàjì amu kàdi kacìyi ne mapondo to, nudi bamanye’s, mùtù cinù cyà mwànà wa balùme’s. Ki mémè kumanya ne ùvwa mmwànà wa bakàjì. Nènku uvwa muvwale pìjámá wendè awu. Ke kulwaye, wenda mutangile kùndì, wenda usaamuna nsuki yèndè ayi. Udi naayi yà mitòòkoloka, wenda ùyisaamuna.

<sup>35</sup> Mwànà wa bakàjì awu mmusòmbele mu Salem, leelù ewu, ùdi ku dibàkà, ne ukaadi ne bânà basatu anyì bànaayi. Ne mamwèndè ne tatwèndè bàcìdi ànu mwómò amu, kàbìdì.

<sup>36</sup> Nènku ki mémè—mémè—mémè kwalukila mu mémè. Nènku mvwa mwà kuumvwa muntu kampànda wàmba ne: “Mwanèètù Branham...” Anyì ne: “Mwanèètù Bill! Kaa, Mwanèètù Bill!” Kàdi mmamwànyì uvwa umbiikidila awu. Ki mémè kudyambidila. Mvwa mwà kuumvwa umwe, mu mùshindù kampànda. Pàmvwà mpatuka mu cikèènà-kumòna aci, nudi bamanye’s, byenze bu ncìyi mu mémè to. Ki mémè ne: “Udi ukeba cinyì, maamù?” Mu cibambalu cìvwà cìlondà, mùvwàye mulààle.

Ki yèyè ne: “Kùdi muntu ukookola ku ciibi cyèbè aku.”

<sup>37</sup> Ki mémè kucyumvwa ne: “Mwanèètù Bill!” Ki mémè kuunzulula ciibi. Kuvwa muntu kampànda wàkàbwela. Dìna dyèndè uvwa n’John Emil. Mmusòmbele mu Miami, mu Floride, patùdì twakula apa. Ki yèyè ne: “Mwanèètù Bill, kucyèna mumvùlùke to.”

Mémè ne: “To. Ncyèna ngeela meeji ne ndi mukuvùlùke to.”

<sup>38</sup> Yèyè ne: “Wèwè’s ngwákambàtiiza pàmwè ne famiye wanyì. Kàdi,” yèyè ne, “mémè kwangata njila mubì.” Yèyè ne: “Mvwa mushipe muntu, mwab’ewu kùkaadi cikondo kampànda. Mumukume dinkomò, ne mumucibùle nshìngù, mu mvità kampànda.” Yèyè ne: “Ndi mujimije umwe wa ku bânà bàànyì bakesè bàà balùme, mukulumpe ku bwònsò.” Ki yèyè ne: “Wa mutekète ku bwònsò, mmulààdika kumbelu aku, ùpunga ne lufù patùdì twakula apa.” Ki yèyè ne: “Ngàngàbuka wa cimenga eci uvwa ufuma ku dyumuka, kàdi mmwambe ne: ‘Mwànà awu ùdi ne dìsaamà dyà bisùlùsùlù pàbìdì.’ Nènku ùdi ànu ne lutàtu bwà yèyè kupuuyakana.” Ki yèyè ne: “Ndi—ndi—ndi—ndi ànu. . . Wèwè kundwila mu meeji àànyì. Nènku ndi ndikonka ní udiku mwà kulwa bwà kumusambidila.” Ki yèyè ne: “Mpindyewu, bu mùdì mumanye, mémè ndi mwanààbo ne Graham Snelling wa tatwèndè mukwàbò.” Mbwenà kwamba ne, Graham Snelling,



Révérènd Graham Snelling awu mpindyewu, yêyè kàvwa mwanji kulwa mwambi pa diine díbà adi to; mwànà wa balume mwena Kilistò mulenga. Yêyè ne: “Mmwanèètù wà tààtù mukwàbò. Nyaaya kamukeba.” Yêyè ùvwa musòmbèle bu mu ntàntà wa mètres nkàmà mwandamukùlù nànkù awu, lwà kwinshi kwà cimenga aku. Ki yêyè ne: “Nyààya kamukeba. Nènku neùyeku kuntwaku anyi?”

Mêmè ne: “Èyowà’s, Mukalenge Emil, pàndi ànu mwala bilàmbà pambidi.”

Ki yêyè ne: “Nèngàngatè kashinyi kàànyì, bwà tuye neebè kuntwaku.”

Mêmè ne: “Èyo.”

<sup>39</sup> Yêyè ne: “Pàndi ànu mpeta Graham. Nènku ndi muswè bwà nwènù bònsò nùsambidile mwànà awu.”

Mêmè ne: “Èyo.”

<sup>40</sup> Ki díbà adi mêmè kuya kadìlongolola. Ki maamù kwambayè ne: “Bwalu bùvwa cinyi?”

Mêmè ne: “Kùdi mwànà mukesè wa mu dibòko udi ne cyà kwondopiibwa.”

Nènku ki yêyè ne: “Mwondopiibwe?”

Ki mêmè ne: “Èyowà’s, maamù.”

Ki mêmè kwamba ne: “Nènkwambilè byàbùngì pa bwalu abu pàngààlukilà.”

<sup>41</sup> Nànkù mu katanci kakesè, yêyè kukookola ku ciibi, ne bàvwa ne Mwanèètù Graham. Twètù kubanda mwab’ewu, kupicila ku citùdi bamanye bu mwaba wà mààtu mpindyewu aci, cìvwa Mwaba wa mazuwà wà kale wà Howard mu ciine cikondo aci aci. Mêmè ne: “Mukalenge Emil, udi . . . Udi musòmbèle penyì mpindyewu?”

Yêyè ne: “Lwà ku mutù kwà Utica kwàka.”

<sup>42</sup> Mêmè ne: “Udi musòmbèle mu kazùbu kakesè, katùtù tubiikila ne nkàà ‘shotgun’ aku, kàà tuubibambalu tukese túbìdì.”

“Èyowà’s, mukalenge.”

“Nkaashila pa kakùna’s.”

“Èyowà’s, mukalenge,” mwàkambaye.

<sup>43</sup> Mêmè ne: “Kwinshì kwa bimanu munda mwà nzùbu webè—webè awu’s nkwela mabaya manoona ne matapa nsalu yà mishoonyi, ne mmalaaba mukubu mukunze.”

Yêyè kwamba ne: “Ncya bushùwà.”

<sup>44</sup> Mêmè ne: “Mwànà mukesè wa mu dibòkò awu mmulàadika mu bulàalu bwà milonda bwà kuulu. Nènku ùdi bulelèlè mu

nzùbu amu, nànsha kayi mumuvwàla to, ne nsalabeeta wa vèlùrè wa bleu.”

Yèyè ne: “Udi nende pambidi.”

45 Ki mèmè ne: “Nènku mwànà ewu mmuntu wa mukèsè menemene, wa bidimu bitwè ku bisàtu. Nènku ùdi kàbìdì ne mukana mukèsè menemene, tushiku tukesè twa mupimbu mukèsè. Ne ùdi ne nsuki yà mifìkuluke kakesè.”

Yèyè ne: “Aci mbulelèlè.”

46 Mèmè ne: “Mandamu Emil mmukàjì wa nsuki mifìike. Ne mu cibambalu emu, wèwè udi ne nkwasa wa muleepa wa kànàpè ne nkwasa mukunze.”

Yèyè ne: “Ùkààtukù mufikeku anyi, Mwanèètù Branham?”

Mèmè ne: “Kwènjì ànu katanci.”

“Kukaadi katanci?” mwàkambayè.

Mèmè ne: “Èyo.”

“Mòna’s,” mwàkambaye, “kacya ncituku mwanji kukumòna to.”

47 Mèmè ne: “To. Bivwa mmu nyumà.” Mèmè ne: “Mukalenge Emil, s’udi muumvwe kwambila, piikalabi ne mèmè ngudi mukubàtùize, bwà bintu bitu bingenzekela. Bìdi mwà... Ndi mmòna bintu kumpàla kwà kwenzekabi.”

48 Yèyè ne: “Èyo. Cintu bu nànkù ncikwenzekeleku anyi, Mwanèètù Branham?”

49 Mèmè ne: “Èyo. Kabidi Mukalenge Emil, cyònsò cìvwàCi cìvwà cingambile nànkù aci, kacya kacitukù cyanji kungambila bwalu bwà mashimi to. Mwanèèbè wa mu dibòkò neàsàngale pàngààfikà kuntwaku.”

50 Ki kwimanyikaye màshinyi awu, kudypwilaye ku yèndà aku, kwambaye ne: “Nzambì, ikalaku naanyi luse. Ngalujèku, Èyi Mukalenge.” Nwamònu anyi? “Nènku ndi nKulaya, bwà kwikala ne mwoyi Bwèbè Wèwè, matùkù àànyì ònsò à mwoyi, bu Wèwè mwà kupandisha mwoyi wà mwanàànyì.” Nènku ànu pòpò apu kufilayè mwoyi wèndè kùdi Kilistò. Twètù kubwela mu nzùbu, bònsò basaluke bwà bwalu bwèndè, musùùkà mwaluja kùdi Kilistò.

51 Patwà—patwàkabwela mu nzùbu, ki bintu byònsò abi byadija ànu menemene mùshindù ùvwàbi awu, ànu mukàjì mukulakaji awu ngùvwa kàyimù to. Byà bisalula’s, mwikale musaluke bikolè, mèmè ne: “Ntwàdìlè mwànà awu.” Nènku mwànà ukaavwa ànu wàmba kufwà. Nwamònu anyi? “Dikonyangala” adi, òvwa mmwoyi ukaavwa mupatuke mu mwànà awu. Ùvwa ànu mukonyangale bikolè *mwab’ewu*, muminu wèndè mukèsè awu. Ki mèmè kwamba ne: “Ntwàdìlèku mwànà awu.” Nciyi ngindile bwà cikèènà-kumòna aci kuulaci to.

52 Mwanèètù Vayle, byòbì bikèngela bwà ne kalipè aka kiikale *mwab'ewu*, ncyènakù mwà kwamba bwalu kalipè aku kakàyi katèèka mwaba awu to. Nwamònu anyi? Bidi ne cyà kwikala ànu mùshindù ùdiCi cindeja awu.

53 Ki mèmè ne: “Ntwàdìlè mwànà awu.” Ki papa kulwaye ne mwànà awu kúndi, ne mèmè kumusambidila, kàdi kutàmbabi kubìpa's. Ki mèmè kudyambidila ne: “Mpindyewu cintu kampànda . . .” Kupangilaye ne mweyelu, ki kukèngelabi bwà kulwishakaja bàamunyukusha ne bikwàbò, bwà kumwalujila mweyelu. Mèmè kudyambidila ne: “Mpindyewu, kùdi cintu kampànda cìdì kaciyi cyende bìmpè to.”

54 Ki kumfikilabi bwà mèmè kudyambidila ne: “Mukàjì mukulakaji awu udi penyì?” Awu kàvwa mwanji kwikalapu to.

55 Pa nàнку kwangatàbo mwànà awu, kumulààdikàbo panshi. Bavwa munkacì mwà kumulaaba bintu ku dyulu, ne bikwàbò byònsò, ne bàdila myadi. Mamwèndè wela mbila, bu mutomboke, ne bikwàbo byònsò. Kàdi mwànà uvwa weyela ànu—ànu kakesè menemene.

56 Mèmè kudyambidila ne: “Èè, nku bukùtàkànè bwànyì—bwànyì's, Ndi mukwàte mudimu bibi ne cikèèna-kumòna cyà Nzambì, bwalu ncivwa muCindile to, mwikale mutambe kusaluka bikolè.”

57 Ku cyòci eci, udi mwà kumòna ne, Mwanèètù Vayle, mbwà cinyi ntu ngindila. Nànsha nganyì mungambile. Ndi mukunange bu mwanèètù wa balùme. Mwanèètù, kudìdingi kuteeci, bwà kungambila cintu kampànda cyà dyenza to, pàndì—pàndì ngumvwa ne ndi—ndi ne diswa dyà Mukalenge. Nwamònu anyi? Nànsha mùshindù mukwàbò ùmweka mwìmpè bishi, mèmè nèmMwindile. Nwamònu anyi? Nènku—nènku ki mèmè—mèmè kuyiila dileesònà mwab'awu mene, kùkaadi bidimu byàbùngì, byàbùngì be, byàbùngì menemene; ànu bwà kwenza menemene cìdiYe wàmba, ne kubenga kucyenza too ne padiYe wàmba ne cìdi pabwìpi bwa kwenjiibwa.

58 Mwànà awu uvwa ulwangana bwà kweyela. Mpindyewu, ncivwa mwà kubambilaku cìmvwà mwenze to, kàdi byàkakèngela ànu bwà mèmè kwindila. Mèmè kudyambidila ne: “Pàmwàpa ngàsà kàakucimbadila to, nènku Yèyè ùdi umfwila luse.” Èè, mèmè kuya, e kusòmbela panshi.

59 Bààkalwangana bwà mwoyi wa mwànà awu too ne pààkatòoka kwìsù. Pààkabangaku kucya, kwelabo meeji ne mwànà neàtuule nkinda díbà kanà dyònsò. Èè, mèmè kusòmba mwaba awu. Ki bòbò kutùngùnuka ànu ne kunkonka ne: “Mwanèètù Branham, citùdì ne cyà kwenza ncinyì?” Anyi ne: “Mwanèètù Bill,” mùvwàbo bambiikila, “cìndì ne cyà kwenza ncinyì?”

60 Mémè ne: “Ncyéna mumanye to.” Nwamònu anyi? Mémè kushààla musòmbe mwaba awu, mutù wànyì mwinyika, ngamba ne: “Mukalenge, bu wêwè mwà kuswa umfwileku luse.”

61 Èè, ki dîbà adi kwisù kutòokakù. Mwanèètù Graham Snelling uvwa ne cyà kuya ku mudimu. Pa nànkù Mukalenge Emil uvwa ne cyà kukamufila, nènku mvwa mumanye ne bìvwa bìkèngela bwà mèmè kuumuka mu nzùbu amu.

62 Kàdi, nànsha nànkù, Mwanèètù Graham ùvwa ne cyà kwikala musòmbe mwaba awu, bwalu yêyè ùdi ne nsuki mitòòkoloke, yà mvwangala, bu munùdi bamanye. Ùvwa ne cyà kwikala musòmbe pa nkwasà muleepa wa kanàpè awu’s. Pa nànkù mvwa musòmbe mwaba uvwa Mwanèètù Graham ne cyà kwikala musòmbe mwaba awu, kàdi mukàjì mukulakaji awu kavwamù to. Nènku kakùyìkù mukàjì mukulakaji nànsha umwe mu mwaba awu to. Ki mèmè kusòmba mwaba awu. Ki pa nànkù Mukalenge Emil kulwàtayè nkooici wèndè.

63 Pashiishe mvwa mumanye ne, Mwanèètù Graham yêyè muumuke, bìvwa bikolè bwà kumanya dîbà divwaye mufwànyine kwalukila. Nwamònu anyi? Nènku dîbà adi mvwa mumanye ne, nànsha bu mukàjì awu mwa kulwa, dîbà adi Mwanèètù Graham kààkwikalaku to. Pa nànkù nudi numòna mu ngiikadilu ùmvwa nsanganyiibwa’s.

64 Ki Mukalenge Emil kwambaye ne: “Mwanèètù Branham, udi muswè kuya anyi?” Anyi ne: “Mwanèètù Bill, udi muswè kwalukila kumbelu anyi? Udi muswè bwà nkakwaluje kwèbè kumbelu anyi?”

65 Mémè ne: “To, mukalenge. Nèngǎnjì ànu kwindila, pìikalabi kabiyi bikutàcisha to.” Ncivwa muswè bwà kushààla mu nzùbu amu, ànu ne mwànà wa mu dibòko awu ne mamwèndè, ne mèmè to, bwalu bàvwa bansonga. Bòbò, yêyè, ukaavwa ne bidimu bitwè ku makumi àbìdì ne bitaanu, ngeela meeji. Nènku mèmè mvwa ne bidimu bu bìmwèbìmwè abi. Ki mèmè ne: “To. Mémè—mèmè nèngǎnjì ànu kwindila, pìikalabi kabiyi bikutacisha to.”

Yèyè ne: “Bìdi ànu bímpè, mwanèètù, Mwanèètù Bill.”

66 Nènku ki maamù awu wenda wenda mu cibambalu amu, wela mbila wùminyina, ne ùteeta bwà. . . ùdila ne bikwàbò byònsò, nudi bamanye’s. Ne mwànà awu ànu mu ngiikadilu mubì mutambe. Nwamònu anyi? Mbyenze ànu bu ne, mu kasunsa kanà kònsò, ànu bu udi ukoka mweyelu wèndè awu, mùshindù awu, wenda uya, *ushikunkila*, *ushikunkila*, ki mweyelu wònsò uvwaku, uvwaye mushààle naawu. Nènku kakùyì cintu nànsha cimwè. . . Kabàvwa ne pènèsèliinà ne bikwàbò to, mu miine matùkù awu, nwamònu’s. Nànkù bàvwa ànu—bàvwa ànu balamikapu àmwè manga, ne bintu bu nànkù. Kàdi mwànà mukèsè awu uvwa naabi munda mwà matùkù mulongolongo. Nènku ùvwa muye, nwamònu’s, anyi wenda uya.

67 Nènku, díbà adi, mémè—mémè kusòmba mwaba awu. Mémè kudyambidila ne: “Ekèlekèle, Graham yèyè muye. . .” Graham kuvwàlayè nkooci wendè, nènku kwasaye lwendu mutangile ku ciibi bwà kuya.

68 Ki kwambilaye mukàjèndè, yèyè ne: “Mpindyewu, netwàlukile, ànu mu katanci emu.”

69 Mémè kudyambidila ne: “Éyì Nzambi wa yààya, díbà adi ne bikèngele bwà mémè kushààla mwab’ewu ditùkù dijimà, ne pàmwàpa bufùkù bujima, kàbìdì, nwamònu’s, mwindile cikèènà-kumòna aci. Cìndì mwà kwenza ncinyi?”

70 Nènku mémè kwela dísu pa dìdìdishi. Ki kakwèndè mukàjì wa mwànà ulwàlwa ewu, wènda ùseemena pabwìpi ne nzùbu. Nènku, èè, mémè kuyiila pashiishe, ne ùvwa nkakwèndè mukàjì. Nènku ùvwa muvwale binetè. Mémè kudyambidila ne: “Ki cyòci eci, Mukalenge, pìikalabi—pìikalabi ne Graham kèna ànu mwanji kupatuka to.” Pa nànkù, mukàjì mukulakaji ewu ùtu misangu yònsò ulwila ku ciibi cyà kumpàla. Kàdi, mu mùshindù kampànda, kabàyi nànsha bamanye to, too ne leelù ewu, kàdi yèyè kuyiila ku ciibi cyà kumfundu, kubwelaye mu cikukù. Nènku kubwelaye mu cikukù, mu kazùbu kakesè, kàà kale aku. Nènku mmwenze ànu ufika ku ciibi, mwan’ende wa bakàjì awu kuyaye lubilu mwaba awu e kumuupukila, bwalu ùvwa mmamwèndè wa mwànà wa bakàjì awu, nudi bamanye’s, ne kumuupukilaye. Ne Mwanèètù Graham. . .

Pashiishe kwambaye ne: “Kùdikù dishiilangana ne mwànà anyi?”

71 Yèyè ne: “Maamù, ùdi upunga ne lufù.” Ki kubangaye kwela mbila mùshindù awu, ki mamwèndè kudítwa mu mwadi.

72 Pashiishe mémè kudyambidila ne: “Eci cyòci ànu mwà kukumbana, mpindyewu, pìikala Graham kàyi mupàtùke to.”

73 Ki mémè kujuuka. Nènku ncivwa mufwànyine kwamba cintu nànsha cimwè to, nudi numòna’s, ànu kwindila cyanààna. Ki Mwanèètù Graham kunyungùlukaye. Mémè kujuuka kuulu bwà yèyè wàmona mwà kusòmba panshi. Nènku yèyè. . . Nènku civwa mbàmwè bàà ku balelà bèndè, nudi numòna’s, ki kubangaye ànu kudila, pèndè, ne kusòmba mu nkwaswa wa kanapè mùvwàye ne cyà kwikala musòmba amu.

74 Mémè kudyambidila ne: “Mpindyewu, bu inàbànza mununu awu mwà kuseemena bwà kusòmba mu nkwaswa mukunze ewu!” Ki mémè kwalukila ku ciibi kùvwa Mukalenge Emil mwimanyine aku, ne cinkooci cyèndè pambidi, ne mudilongolole bwà kupatuka. Kuvwa mashika èbè à dikema, mashika à cipeepèlè cyà nêjè. Mémè kudyambidila ne. . . Nènku inàbànza mununu ewu kusòmbaye mu nkwaswa ewu’s.

75 Ne Graham kusòmbayè, ne kwiamijaye mutù panshi. Ki mamwèndè wa mwànà awu, kutwa cyanza cyèndè lwà ku ciibi

aku, ne kubangaye kudila mwadi. Ànu menemene cikèèna-kumòna aci! Ki inàbànzà mununu awu kusòmbelayè panshi. Kàdi pamutù pàà kwikalaci binsonji, ànu byètù byà menemene ebi, pa binetè byèndè abi; bu muvwaye ufumina pa mashika, bivwa ne maciima à nêjè. Ki kwelayè cyanza mu kabuta kèndè kakesè aku ne kupatula kaamushwàle kakesè, ne, anyi kabuta kakesè kàà ku dyâpa, ki kubangaye kukupula binetè ebi. [Mwanèètù Branham udi utuuta cishòndò—Muf.] Mwanèètù, ki muvwi.

<sup>76</sup> Mémè kwambila Mukalenge Emil. Mémè ne: “Mukalenge Emil, uci di ànu ne dyeyemena mu mémè bu musadidi wa Kilistò anyi?”

Yèyè ne: “Ncyà bushùwà ne ndi naadi, Mwanèètù Branham.”

<sup>77</sup> Mémè ne: “Ndi mwà kukwambila mpindyewu. Mvwa mwakule kumpàla bwà cikèèna-kumòna, kwenjì katanci, ki bwà cinyi cintu ki ncyenzeke to. Pawikala uci di ànu ne dyeyemena mu mémè, nda ùntwàdile mwanèèbè wa mu dibòko awu.” Kaa, ekèlekèle! Ndi mmòna ne civwa mu cyòci, díbà adi, nudi numòna’s. “Ndaaku, ùntwàdile mwanèèbè wa mu dibòko awu.”

<sup>78</sup> Yèyè ne: “Nèngènzè cyònsò cyùdi ungambila bwà kwenza aci, Mwanèètù Bill. Ncyèna mufwànyine kuciina bwà kumwambula to.” Bwalu, pàvwàbo bamwambula, ùvwa wàmba kufwà, mweyelu wònsò nkông umba uya. Kuntwàdilayè mwànà mukesè ewu. Kuseemenaye mumwambule mu mabòkò èndè amu, kumuntwàdilayè, ne kwimanaye mwaba awu.

<sup>79</sup> Mémè kumutentekela cyanza, kwamba ne: “Mukalenge, mfwàkukù bukùtākàne bwà musadidi Webè luse. Wamònu anyi? Mvwa mwakula kumpàla kwà cikèèna-kumòna Cyèbè. Kàdi mpindyewu bimanyiibwe ne Wèwè udi Nzambi wa mauulu ne buloba.”

<sup>80</sup> Ànu ngàmba nànkù anyi, mwànà mukesè awu kujìngila tatwèndè mabòko ku nshìngù, kubanga kwela mbila udila, wàmba ne: “Papa, ndi muumvwe bìmpè mpindyewu.” Nwamònu anyi?

<sup>81</sup> Mémè ne: “Mukalenge Emil, kutacishiku mwànà mukesè awu to. Nekwenze matùkù asatu kumpàla kwà kuumumukabi, bwalu yèyè uvwa mwele bidya bisatu, mu didikùtulula amu.”

<sup>82</sup> Mémè kwalukila kwàanyi kumbelu, nènku mémè kubulonda mu èkèleeziyà wanyì. Mémè ne: “Nèngààlukilè.” Civwa mmu òmwè. Mémè ne: “Mu diisàtù dilòdò, kumpàla kwà masangisha, nèmbandè kuntwaku.” Bavwa bantu bapèle, nènku twètù kubalongolwela citunga cyà byàkudya, bwà kubàtwàdila. Ki mémè ne: “Ndi muswè bwà nwènù bònsò kuya, ne pàngààyakù apu. Nènku nudi nwimanyina pabwìpi ne nzùbu awu. Nènku pàngààfikà mwaba awu, mwaba udi nzùbu awu usanganyiibwa, nutangile bwà numònebi mwànà mukesè awu ní kàakulwa

wenda ukosolola mu nzùbu amu, mwikale ne mumfwèmfwè mudizole *apa*, pàvwàye munwè mabèèle meela shòkòlà anyi cintu kampànda. Nwamònu anyi? Nènku utèèka byanza byèndè mu byànyì, ne wàmba mèyì aa ne: ‘Mwanèètù Bill, nkàdì muumvwe bìmpè menemene.’ Mwànà mukesè wa balùme wa bidimu bisatu ewu’s. Tàngilàayi numòne ní kabyena byenzeka.”

<sup>83</sup> Mukàjàànyì wa mpindyewu, Meda ewu, kumpàla kwà twètù kuselangana, nènku ùvwa mu musùmbà wa bantu awu. Ki bantu màmshinyì tente kuyabo ne kwindilabo pabwìpì ne nzùbu awu, nwamònu’s, bwà kummòna pàmvwà ndwa mwendeshe màmshinyì manène à kale à Kumpangani wa Midimu yà Mbulamatadi àmvwà naawu kwanyì kumbelu dilòlò adi. Ncìvwa ne àànyì mashinyì àà nkààyaanyì to. Mùle tente ne kaabùdimbwa paanyimà pààwù apu, ne bikwàbò, nudi bamanye’s, mùmvwà nkàmbye ditùkù adi, ndongolola bintu. Mémè kwendesha too ne kumpàla kwà nzùbu awu, kwimana. Kubànda mu lutanda; kukookola ku ciibi. Nènku kabavwa ne tapis panshì pàà nzùbu apu to. Ki maamù awu kulwaye mwaba awu, kwambaye ne: “Mòna’s, m’Mwanèètù Bill,” mùshindù awu. Nènku bantu bavwa munkaci mwà kutangidila mu madìdiishì, pa díbà adi, bwà kumòna cìvwa mwà kwenzeka.

<sup>84</sup> Nènku mu ditumba amu, s’ki mwànà mukesè wa balùme ewu, munkanci mwà kunaya, mu ditùkù diisàtù. Mémè kwimana, mupuwe ànu vù. Ki kulwaye, wenda wenda mwaba awu, kutèekaye tuubyanza twèndè tukesè atu mu byànyì. Mwikale ne. . . Ùvwa munwa mabèèle meela shòkòlà, ne mumfwèmfwè wèndè mukesè awu, mùshindù awu, lwa *mwab’awu*, wà ku mabèèle meela shòkòlà awu’s. Kutentekaye byanza byèndè mu byànyì, kwamba ne: “Mwanèètù Bill, mémè’s ndi muumvwe bìmpè ànu menemene.” Huh!

<sup>85</sup> Dilòlò adi, mu èkèleeziyà, mvwa mucìlondè. Mémè kwamba ne: “Kùdi mwànà wa bakàjì cikalàbà, mwaba kampànda, mwikale mu lukengelu.” Mémè ne: “Èkèleeziyà, ncyèna mumanye cìdi bintu ebi byumvwija to. Ncyèna mwà kunwambila to.”

<sup>86</sup> Nènku—nènku mvwa ngenza mudimu ku Midimu yà Mbulamatadi. Nènku ndi mvùluka dīngà ditùkù, bu lumingu lujimà nàнку awu paanyimà pàà aci, mémè kubanga kuumuka mu nzùbu awu, ngenda mpàtuka. Mukalenge Herb Scott, mmusòmbèle mu cimenga emu patùdi twakula apa, yèyè nguvwa mfùmwanì wa mudimu. Ki kwambayè. . . Nkààvwa mpweka. Yèyè ne: “Billy?”

Mémè ne: “Yě.”

Yèyè ne: “Kumpàla kwà wèwè kuumuka, ndi ne mukàndà mukutumina mwab’ewu.”

Mémè ne: “Èyo, Herbie. Nèngwangàtè mu katanci kakesè emu.”

<sup>87</sup> Nènkù—nènkù ki mèmè kuya bwà kwangata mudimu wànyì mukwàbò, ùmvwà nkenketa. Ki mèmè kuya bwà kwenza mudimu wànyì mukwàbò awu. Nènkù pa—pangawenji, mèmè kuvùluka mukàndà muntumina awu. Mèmè kuya kawàngàta, kuwùbuulula. Nènkù ùvwa wàmba ne: “Mukalenge munanga Branham,” nwamònu’s, yêyè ne, “dîna dyànyì ndi Nail. Ndi Mandamu Harold Nail. Tudi basòmbèle mwaba ùdibu babiiikila ne South Boston.” Ki yêyè ne: “Tudi ba-Méthodistes, ku diitabuujà. Ki kwenzekabi ne mèmè kubala kakàndà kakesè kaùdi mufùnde, kaa ne *Yesù Kilistò Umwèumwè Awu Makèèlèlè, Leelù, Too ne Kashidi*, kakàndà kakesè kàà kubunya. Nènkù tuvwa twenza disangisha dyà milòmbò mu nzùbu mwètù, dilòòlò adi. Nènkù tudi buumvwe bàakula mùdi mutuute dyàkalenga, mu disambidila dyà babèèdi.” Ki yêyè ne: “Ndi ne mwànà wa bakàji mutàcishiibwe, wa bidimu dikumi ne bitaanu,” yêyè ne, “udi mulàale pa bulàalu bwà disaamà. Nènkù mu mùshindù kampànda, ncyèna ànu mwà kucyumusha mu meeji ànyì to, bwà ne bìvwa bìkèngela bwà wèwè kulwa kusambidila nsongàakàji ewu. Udiku mwà kulwa anyi? Webè wa pamwoyi, Mandamu Harold Nail. South Boston, Indiana.”

Mèmè ne: “Udi mumanye’s, s’ki mwànà wa bakàji awu’s. S’nyêyè awu.”

<sup>88</sup> Mèmè kwalukila kumbelu, kucyambila mààmù wanyì, kubalondela cyòci aci. Mèmè ne: “S’ki—s’ki mwànà wa bakàji nyêyè awu’s.” Ki pashùshe dilòòlò adi, mu èkèleeziyà, mèmè kwambila èkèleeziyà. Mèmè ne: “S’ki—ki—ki—ki mwaba ngwòwò ewu.” Mèmè ne: “Kùdiku muntu mumanye mwaba ùdi South Boston usanganyiibwa anyi?”

<sup>89</sup> Nènkù Mwanèètù George Wright, nwènù bònsò nudi bamumanye, yêyè ne: “Mwanèètù Branham, ùdi . . . ngeela meeji ne ùdi lwà mu Sud mwàmwa.”

<sup>90</sup> Nènkù ditùkù dyàkalondà, balunda bàanyì bàbìdi, ne mukàjàànyì, wa mpindyewu ewu, ne mulùme ne mukàjèndè bàà ku Texas. Na-. . . dîna dyàbò divwa Brace, Ad Brace. Mmusòmbèle muntwamu mpindyewu, lwà kwìnshì kwà Milltown, cidimè. Ùvwa mulami wa bimuna mu Wesètè mwàmwa. Nènkù ùvwa mulwe muneemu bwà kwikalala pabwìpì ne èkèleeziyà. Nènkù mvwa musambidile mukàjèndè, ne yêyè kwondopiibwa ku disaamà dyà cyàdi. Nènkù ùvwa muswè kumòna cyòci eci cyenzeka. Mèmè kwamba ne: “Uye naanyì, bwà umòne ní kabyena byenzeka ànu mùshindù ewu.” Pa nànkù inábànzà awu kacya kavwaku mwanji kumòna cikèènà—kumòna to, Mandamu—Mandamu Brace. Ki mèmè kuya ne mukàjàànyì. Nènkù Mwanèètù Jim Wiseheart, mukulumpe mununu awu, nudi bavùluke’s, èkèleeziyà kuntu kwàka, mulami wa kale awu, ùvwa muswè kucimòna. Mvwa ànu ne kàshinyì kakesè, kàà kale kàà kàmbèlè dībà adi, nènkù mèmè kubapayamù bònsò.



91 Ki twètù kupweka lwà kwinsì kwà New Albany. Nènku mèmè kusangana cimanyinu eci, nènku mèmè kulwa kujandula ne, kacivwa South Boston to. Cìvwa n'New Boston. Pa nànkù mèmè ncivwa mumanye ne kwakuya nkwepi to, ki mèmè kwalukila mu Jeffersonville ne kukonka muntu kampànda. Ki muntu kampànda kuyaye ku mwaba wà poste, kwambabò ne: “South Boston ùdi kuulu kwà Henryville.”

92 Ki mèmè—mèmè kubanda ku Henryville, ne mèmè kukonka mwaba awu. Ki kwambabò ne: “Kudimuka mu njila ewu. Kuvwa mu ntàntà wa kilòmèètà mitwe ku makumi àbìdì ne yinaayi, lwà kumutu kwà tukunà etu eku, udi usangana kaaba kakesè kampànda. Wàdimuka, cyanààna neùkapangile,” mwàkambabò, “bwalu kùdì ànu kaamakajiinyi kakesè kamwèpelè. Ne kaamakajiinyi aku kàdì ne kaaba kaa poste, ne bikwàbò byònsò, munda mwaku amu. South Boston, lwà mu tukunà amu's.” Kùdì hectare mitwè ku binunu mwandamutekète yà tukunà atu muntwamu, nudi numòna's. Nènku eci cìdì lwà paanyimà pààku apu, mu tukunà atu amu.

93 Ki twètù kutungunuka, twenda tubànda. Nènku dyàkàmwè, mèmè kudyumvwa mùshindù wà pabwàwù menemene, paanyimà pàà bamane kwendesha màshinyi, mu ntàntà wa kilòmèètà mwandamukùlù anyi citèemà ne citùpà, mèmè kuumvwa cintu cyà pabwàcì menemene. Mèmè kwamba ne: “Ncyèna mumanye to.”

Bòbò ne: “Mbwalu kaayi abu's?”

94 Mèmè ne: “Ngeela meeji ne—ne Ewu utu uyiikilangana naanyi awu, mmuswè bwà kuyiikilangana naanyi, pa nànkù nebikèngele bwa mèmè kuumuka mu màshinyi.”

95 Ki mèmè kupatuka mu màshinyi amu. Ne bakàjì basòmbangana pa bibelu, nudi bamanye's, ne bikwàbò byònsò, mu kàshinyi kakesè kàà kale kàà kàmbèlà aku. Ki mèmè kupatuka mu kàshinyi, ki mèmè kunyùngùluka kuya paanyimà pàà kàshinyi aku. Ki mèmè kwinyika mutù, kwambika dikàsà dyànyì pa cikàndiki aci apu, paanyimà pàà kàshinyi aku apu. Ki mèmè ne: “Taatù wa mu Dyulu, Udi muswè bwà musadidi Webè amanye ncyènyè?” Ki mèmè kusambila. Cintu ki ncyènzèka. Mèmè kwindila ndambù wa tusunsa. Ki mèmè kudyambidila ne: “Èè, Yèyè. . .” Pa ciibidilu mwaba ùdì musùmbà wa bantu bu nànkù awu, bikèngela ngiikale pàà nkààyaanyi. Nènku ki mèmè kwindila ndambù wa tusunsa.

96 Mèmè kubanga kukòkiibwa, kutangila lwà kuulu aku. Mèmè kudyambidilà ne: “Èè, mòna umòne's, s'ki èkèleeziyà wa kale udi musòmba apa ewu.” Nènku ne nukàatuku bafike ku . . . Ng'Èkèleeziyà wa Bunker Hill. Ki mèmè kwela mèsù ku luseke, Èkèleeziyà wa beena Kilistò wa Bunker Hill, nènku kuvwa mabwe à pa nkita à mu nkita, ànu lwà mumpàla mwà èkèleeziyà amu.

<sup>97</sup> Ki mêmè kuya mwine mwaba awu. Mêmè ne: “Mpindyewu nudi bônso bapete mikàndà mitufundila ayi.” Kacya ncitukù mwanji kudyata mu citùpà cyà buloba aci kwônso eku to, kacya bandela. Ncítukù mwanji kufika kuulu kwàka to, mwaba nànsha ùmwè, kacya bandela. Ki mêmè kwamba ne: “S’nudi ne mènà ne nomba ayi kàdi lwayi apa, numòne ní kí nnomba umweumwe awu pa dibwe dyà pa lukità edi.” Nènku ke cyôci aci, ànu menemene. Mêmè ne: “Ke cyôci aci. Tukaadi mu njila mujaalàme mpindyewu.” Mêmè kwamba ne: “Awu ùvwa m’Mwanjelo wa Mukalenge.” Nwamònu’s, mêmè kupicila ànu pabwìpì apu, nciyi mucìmanye to. Pa nàнку, kaa, Yèyè’s mmupwàngàne.

<sup>98</sup> Nènku ki twètù kutunguka ne kwendesha màshinyi. Dyàkàmwè mêmè kutwilangana ne muntu kampànda, ki mêmè kwamba ne: “Udiku mwà kungambila kùdì South Boston usanganyiibwa anyi, mukalenge?”

<sup>99</sup> Yèyè ne: “Udi uya uya ku dyàbalùme ne ku dyàbakàji,” nudi bamanye’s, ne bikwàbò byà mùshindù awu. Ki twètù kutungùnuka ànu ne kuya.

<sup>100</sup> Nènku paanyimà pàa katanci, twètù kubwelamu, mêmè kumòna, mêmè kubwela mu kaaba kakesè kampànda. Nènku civwa cyenze bu kaamusòkò kakesè, bu nàнку awu. Ki mêmè—mêmè kutàngila. Mêmè ne: “Ki cyôci aci. Ki cyôci aci, ànu mwaba awu mene.” Mêmè ne: “Kùdi...Mwaba awu, s’ki cibadi cyà mpàla cyà kalaabi cyà màkàjiinyi aci’s.” Ki mêmè ne: “Mpindyewu, tàngilààyì. Muntu mulùme neàpatukemù, muvwale nsalàbeeta wa bleu pambidi, ne vèlùrè mutòoke... anyi kafulu kàa vèlùrè kàa kalaabi’s, mwikale ne mumfwèmfwè mutòoke, ungambila kwàkuyiila. Byôbi kabiyi nàнку to, ndi mwena mashimi wa dikema.”

<sup>101</sup> Nàнку bavwa bônso bindile. Ki—ki mêmè kwendesha too, ne kumpàla kwà mwaba awu. Kàdi ànu pàngimànyiki apu, kumpàla aku, kupatukamu muntu mulùme muvwale nsalàbeeta wa bleu pambidi, ne kafulu kàa kalaabi kàa vèlùrè ku mutù, ne mumfwèmfwè mutòoke. Nènku Mandamu Brace kuuminyinaye mu màshinyi, pa kucimòna cyenzeka, mùshindù awu’s.

Mêmè ne: “Mukalenge, wèwè’s ki udi ne cyà kungambila kùdì Harold Nail ùsanganyiibwa.”

Yèyè ne: “Èyowà’s, mukalenge.” Yèyè ne: “Ùvwa mufùmìne ku Sud anyi?”

Mêmè ne: “Èyowà’s, mukalenge.”

<sup>102</sup> Yèyè ne: “Ukàadi mumupite. Bu mu ntàntà wa mètres nkama mwandamukùlù lwà kwinshi kwà njila awu aku, wàpuke, mu disangu dyà kumpàla ku dyàbakàji. Ubanda, nènku neùsangane cikumbì cinène cikunze, nènku wàpukemu mwaba ùdì cikumbì cikunze awu.” Yèyè ne: “Nzùbu mwibìdì ku dyàbalùme dyèbè aku, paùdì wenda ubànda ne kajila kakesè kenze bu kàa màshinyi àmwè aku.”

Mémè ne: “Èyowà’s, mukalenge.”

Yèyè ne: “Mbwa cinyi?”

Mémè ne: “Yèyè ùdi ne mwànà wa bakàjì mutàcìshìibwe. Ki mmwômò anyi?”

Yèyè ne: “Èyowà’s, mukalenge. Bìdi nànkù’s.”

103 Mémè ne: “Mukalenge neàmwondopè.” Ki mukulumpe awu kubangaye kudila. Nwamònu anyi? Kacya kavwaku mumanye to. Nènku ùvwa mubwejiibwa mu cìkèènà-kumòna. Kavwa mumanye ne civwa munkaci mwà kwenzeka ncinyi to.

104 Mémè kukudimuka. Twètù kufùùlululaku Mandamu Nail cyàkàbìdì. Ki twètù kubàndakù, kubwela mu bulà amu. Mémè kupatuka mu màshinyi, kubanga kubwela. Mémè kubànda mu mwaba awu mutangile ku . . . nudi bamanye’s, mu mwaba ùvwàye. Ki nsongààkàjì kampànda wa katanku kulwaye ku ciibi aku. Mémè ne: “Nyèyè wàwa.” Nwamònu anyi?

Ki yèyè ne: “Wetwawu?”

Ki mémè ne: “Wetwawu?” Mémè ne: “Ndi—ndi Mwanèètù Bill.”

105 “Kaa,” ke yèyè awu, “mémè—mémè—mémè paanyi’s mvwa ngeela meeji ne ng’wèwè’s.” Yèyè ne: “Udi mupete mukàndà wànyì awu anyi?”

Mémè ne: “Eyowa’s, mandamu, mvwa muwùpete.”

Yèyè ne: “Mémè ndi Mandamu Harold Nail.”

106 Mémè ne: “Èè, ndi ne disànkà dyà kukumanya, Mandamu Nail. Nènku aka kàdi ànu kasùmbù kakesè kàdi kalwè naanyì, bwà kusambidila mwanèbè wa bakàjì.”

Yèyè ne: “Èyowà.”

Mémè ne: “Ùkaadi pabwìpì ne kwondopiibwa.”

107 Yèyè ne: “Cinyi?” Ki mishiku yèndè kubanga dizakala. Kubangaye kudila mwadi.

108 Mémè ne: “Èyowà’s, mandamu.” Kàdi ncyèna—ncyèna mumanye to; ncivwa mushààle mwimane ne mukàjì awu to.

109 Mémè kupweka ànu mu cibambalu cinène aci, ne kasùmbù kànyì kwònsò kantwè mu nyimà. Ndi mwenze ànu ngunzulula ciibi cyà dyàbalùmè cyà cibambalu, cinène, cyà kale, cyà nzùbu wa cyena musòkò aci, ngunzulula ciibi, ki bikàndàkàndà byà kalaabi- . . . anyi bibèjibeji byà kalaabi ku cimanu, ne bimfwànyì bikùnze abi; bafundepù ne: “Nzambi àbèneshè nzùbu wetù;” bulààlu bwà kale bwà milonda yà kabanda; dicyùwà dyà citùpà cyà mucì ditèèka ku dyàbakàjì dyànyì aku. Nènku kuvwa kalààlu kakesè kàà dibunya katèèka mwab’awu, kiikale ne mwànà wa bakàjì wa kwisù bu kwà kaansongààlùmè mulààdikapù.

110 Mpindyewu cintu kampànda kwenzekàci. Mvwa nsanganyiibwa mu ditumba dyà cibambalu amu, ntàngila

mubidi wànyì awu uya ku bulààlu abu aku. Ki mèmè kumutentekela byanza mu difu amu, ànu menemene muvwa Mukalenge mwambe. Nènku pangààkenza nàнку, Mandamu Nail mmwenze ànu ùbwela mu cibambalu ne umòna nàнку, kudibyankulaye panshi, cyàkàbìdì, kuuminyinaye. Yèyè's mmuntu wa lùyowayòwà, nènku kuuminyinaye panshi apu, cyàkàbìdì. Ki Mwanèètù wa balùme Nail kuteetaye bwà kumufuululula. Nènku Mwanèètù mukulumpe Jim uvwa mwimane mwaba awu, wàmba ne: "Mukalenge àbèneshiibwe," kacya mudikwate ku byanza, bu nwènù bamanye mùshindù ùvwàye wènza pa ciibidilu. Ki dîbà adi mèmè kutàngila cyòci aci, ki mèmè kumòna cyòci aci.

<sup>111</sup> Ki mèmè kumutentekela byanza, anyì kumucyamakaja mu difu, nùнку *ewu*. Mèmè ne: "Mukalenge, ndi ngenza nùнку ku dîyì dituma dyà mukana dyà, cìndì mèmè ngeela meeji ne ki, mùdì Nzambì mungambile bwà kucyenza." Nènku ànu pa dîbà adi, kubangaye kwela mbila, ne kulàndapukaye.

<sup>112</sup> Nènku bakaavwa baalùje Mandamu Nail mu yèyè. Ukaavwa mujuuke, ku dyuminyina dyèndè adi.

<sup>113</sup> Nènku mwànà wa bakàjì awu mmwenze ànu ulàndapuka mu bulààlu bwèndè amu, ki mukòlò wèndè wà pijàmá ùdì ùbànda ku mukòlò wèndè wà dyàbalùme awu, ànu menemene mùshindù wàkaleejiihwaci mu cìkèènà-kumòna. Nènku's ki cinù cyà civungamane cyà mwànà wa bakàjì aci, pamutù pàà cyà mwànà wa balùme.


<sup>114</sup> Nènku ki Mandamu Nail awu panshi, cyàkàbìdì. Nwamònu anyì? Kuuminyinaye. Aci civwa mmisangu yisatu yàkuuminaye.

<sup>115</sup> Ki mwànà wa bakàjì awu kupatukaye mwaba awu, mu cibambalu amu. Nènku kubwelaye mu cibambalu cyèndè cyà bilàmà, wenda udila, ne kuvwalaye kimono, kwalukilaye, wenda usaamuna nsuki yèndè. Mwikale ne wèndè . . . ne cyà cilem- . . . Ne cyanza cyèndè—cyèndè cimwèpelè cìvwà citekète, kàbìdì, ku luseke lwà dyàbalùme. Usaamuna nsuki yèndè ne cyanza cìvwà cyà bulema aci.

<sup>116</sup> Mmusediibwè, ùdì ne bânà mulongolongo. Dîna dyèndè, ncicyèna mumanye dîna dyèndè mpindyewu to. Kàdì n'Nail, muntu kanà yònsò ùdì mwà kukulondela, Harold Nail.

<sup>117</sup> Nènku bikèènà-kumòna abi mbilelèlè. [Katùpà kàà mukàbà wà mèyì munda mutupu—Muf.] Ndi mwà kwamba aci ne kuya neebè kùdì bantu bàdì bafwànyine kufùndà mipimbu ne mipimbu yà mikàndà yà bintu bu nàнку bìdì byenzeke's. Mpindyewu, aci's ncilelèlè, Mwanèètù Vayle.

<sup>118</sup> Mèmè's nèmpangilè; ndi muntu. Ndi mupangile bwalu, ànu kwine kwònsò aku, ne cintu cyà cyenza ne byà luse cyà dikema's bwà kwikala musadidi wa Kilistò. [Katùpà kàà mukàbà wà mèyì munda mutupu—Muf.]

119 [Mwanèètù Vayle ùdi wàmba ne: “Teela maleeta à Merrell tǔng?”—Muf.] M-e-r-r-e, ne l yìbìdì. [“Mvwa ndyambidila ne civwa lwà kwinshì aku’s. Èyowà’s.”] Ki cyônsò cìdìku anyì, abi mpindyewu? [“Nail uvwa N-e-i-l anyì?”] N-a-i-l. [“Brace, B-r-a-c-e anyì?”] B-r-a-c-e, Ad, Ad Brace. [“Mpindyewu ndi ngeela meeji ne ndi naabo bônso. Indila kakesè. Graham Shelling anyì?”] Graham, G-r-a-h-a-m. [“Aci’s ki ‘n’ awu.”] S-n-e, l yìbìdì, i-n-g. [“Kaa, Snelling. Mpindyewu twăcipeci.”] 

*BİKÈÈNÀ-KUMÒNA BYÀ WILLIAM BRANHAM* LUA60-0930  
(Visions Of William Branham)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu ditaanu mu dindà, matùkù 30 à ngondo wa kaabitende, cidimu cyà 1960, ku Campaign Office mu Jeffersonville, mu Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)